

□ 太陽病 제1조~제178조[001~187]

○ 太陽病 上篇 제1조~제30조[001~031]

- 제1조[001] 太陽之爲病，脈浮，頭項強痛而惡寒.
- 제2조[002] 太陽病，發熱，汗出，惡風，脈緩者，名爲中風.
- 제3조[003] 太陽病，或已發熱，或未發熱，必惡寒，體痛，嘔逆，脈陰陽俱緊者，名曰傷寒.
- 제4조[004] 傷寒一日，太陽受之，脈若靜者爲不傳；頗欲吐，若燥煩，脈數急者，爲傳也.
- 제5조[005] 傷寒二三日，陽明少陽證不見者，爲不傳也.
- * 제6조[006] 太陽病，發熱而渴，不惡寒者，爲溫病.
- * 제6조[007] 若發汗已，身灼熱者，名曰風溫. 風溫爲病，脈陰陽俱浮，自汗出，身重，多眠睡，鼻息必鼾，語言難出. 若被下者，小便不利，直視，失溲；若被火者，微發黃色，劇則如驚癇，時瘈瘲；若火熏之，一逆尚引日，再逆促命期.
- 제7조[008] 病有發熱惡寒者，發於陽也；無熱惡寒者，發於陰也. 發於陽者七日愈，發於陰者六日愈. 以陽數七，陰數六故也.
- 제8조[009] 太陽病，頭痛至七日已上自愈者，以行其經盡故也. 若欲作再經者，鍼足陽明，使經不傳則愈.
- 제9조[010] 太陽病，欲解時，從巳至未上.
- 제10조[011] 風家，表解而不了了者，十二日愈.
- 제11조[012] 病人身大熱，反欲得近衣者，熱在皮膚，寒在骨髓也；身大寒，反不欲近衣者，寒在皮膚，熱在骨髓也.
- 제12조[013] 太陽中風，陽浮而陰弱. 陽浮者，熱自發；陰弱者，汗自出. 嗇嗇惡寒，淅淅惡風，翕翕發熱，鼻鳴乾嘔者，桂枝湯主之.

－ 桂枝湯方：

桂枝[三兩. 去皮]，芍藥[三兩]，甘草[二兩. 炙]，生薑[三兩. 切]，大棗[十二枚. 擘]
上五味，㕮咀. (趙本有“三味”二字)以水七升，微火煮取三升，去滓，適寒溫，服一升.
服已須臾，歠熱稀粥一升餘，以助藥力，溫覆令一時許，遍身烝熱，微似有汗出益佳，不可令如水流漓，病必不除. 若一服汗出病差，停後服，不必盡劑；若不汗，更服，依前法；又不汗，後服小促役其間，半日許，令三服盡；若病重者，一日一夜服，周時觀之. 服一劑盡，病證猶在者，更作服；若汗不出者，乃服至二三劑. 禁生冷·粘滑·肉麵·五辛·酒酪·臭惡等物.

· 제13조[014] 太陽病，頭痛發熱，汗出惡風者，桂枝湯主之。

· 제14조[015] 太陽病，項背強几几，反汗出惡風者，桂枝加葛根湯主之。

－ 桂枝加葛根湯方：

葛根[四兩]，芍藥[三兩]，甘草[二兩]，生薑[三兩. 切]，大棗[十二枚. 擘]，桂枝[二兩. 去皮]，麻黃[三兩. 去節]

上七味. 以水一斗，先煮麻黃・葛根減二升，去上沫，內諸藥，煮取三升，去滓，溫服一升，覆取微似汗. 不須啜粥. 餘如桂枝法.

· 제15조[016] 太陽病，下之後，其氣上衝者，加與桂枝湯，方用前法. 若不上衝者，不可與之。

* 제16조[017] 太陽病三日，已發汗，若吐，若下，若溫鍼，仍不解者，此爲壞病. 桂枝不中與也. 觀其脈證，知犯何逆，隨證治之。

* 제16조[018] 桂枝本爲解肌，若其人脈浮緊，發熱汗不出者，不可與也. 常須識此，勿令誤也。

· 제17조[019] 若酒客病，不可與桂枝湯，得湯則嘔，以酒客不喜甘故也。

· 제18조[020] 喘家作桂枝湯，加厚朴杏子佳。

－ 桂枝加厚朴杏子湯方：

於桂枝湯方內，加厚朴二兩，杏仁五十個，去皮尖，餘依前法。

· 제19조[021] 凡服桂枝湯吐者，其後必吐膿血也。

· 제20조[022] 太陽病，發汗，遂漏不止，其人惡風，小便難，四肢微急，難以屈伸者，桂枝加附子湯主之。

－ 桂枝加附子湯方：

於桂枝湯方內，加附子一枚，炮，去皮，破八片，餘依前法。

* 제21조[023] 太陽病，下之後，脈促胸滿者，桂枝去芍藥湯主之。

－ 桂枝去芍藥湯證方：

於桂枝湯方內，去芍藥，餘依前法。

* 제22조[023] 若微惡寒者，去芍藥方中，加附子湯主之。

－ 桂枝去芍藥加附子湯方：

於桂枝湯方內，去芍藥，加附子一枚，炮，去皮，破八片，餘依前法。

· 제23조[024] 太陽病，得之八九日，與瘧狀，發熱惡寒，熱多寒少，其人不嘔，清便欲自可，一日二三度發，脈微緩者，爲欲愈也. 脈微而惡寒者，此陰陽俱虛，不可更發汗・更下・更吐也. 面色反有熱色者，未欲解也，以其不能得小汗出，身必痒，宜桂枝麻黃各半湯。

－ 桂枝麻黃各半湯方：

桂枝[一兩十六銖. 去皮], 芍藥·生薑[切]·甘草[炙]·麻黃[各一兩. 去節], 大棗[四枚. 擘], 杏仁[二十四個. 湯浸, 去皮尖及兩仁者]

上七味, 以水五升, 先煮麻黃一二沸, 去上沫, 內諸藥, 煮取一升八合, 去滓, 溫服六合.

· 제24조[025] 太陽病, 初服桂枝湯, 反煩不解者, 先刺風池·風府, 却與桂枝湯則愈.

· 제25조[026] 服桂枝湯, 大汗出, 脈洪大者, 與桂枝湯如前法; 若形如瘡, 日再發者, 汗出必解, 宜桂枝二麻黃一湯.

－ 桂枝二麻黃一湯方：

桂枝[一兩十七銖. 去皮], 芍藥[一兩六銖], 麻黃[十六銖. 去節], 生薑[一兩六銖. 切], 杏仁[十六個. 去皮尖], 甘草[一兩二銖. 炙], 大棗[五枚. 擘]

上七味. 以水五升, 先煮麻黃一二沸, 去上沫, 內諸藥, 煮取二升, 去滓, 溫服一升, 日再.

· 제26조[027] 服桂枝湯, 大汗出後, 大煩, 渴不解, 脈洪大者, 白虎加人參湯主之.

－ 白虎加人參湯方：

於白虎湯方內, 加人參三兩, 餘依白虎湯法.

· 제27조[028] 太陽病, 發熱惡寒, 熱多寒少, 脈微弱者, 此無陽也, 不可更汗, 宜桂枝二越婢一湯方.

－ 桂枝二越婢一湯方：

桂枝[去皮]·芍藥·甘草[各十八銖], 生薑[一兩三銖. 切], 大棗[四枚. 擘], 麻黃[十八銖. 去節], 石膏[二十四銖. 碎, 綿裹]

上七味, 咬咀. 以水五升, 煮麻黃一二沸, 去上沫, 內諸藥, 煮取二升, 去滓, 溫服一升. 本方當裁爲越婢湯·桂枝湯, 合飲一升, 今合爲一方, 桂枝二越婢一.

· 제28조[029] 服桂枝湯, 或下之, 仍頭項強痛, 翕翕發熱, 無汗, 心下滿, 微痛, 小便不利者, 桂枝湯去桂, 加茯苓白朮湯主之.

－ 桂枝去桂加茯苓白朮湯方：

於桂枝湯方內去桂枝, 加茯苓·白朮各三兩, 餘依前法, 煎服. 小便利, 則愈.

· 제29조[030] 傷寒脈浮, 自汗出, 小便數, 心煩, 微惡寒, 腳攣急, 反與桂枝湯, 欲攻其表, 此誤也. 得之便厥, 咽中乾, 煩躁吐逆者, 作甘草乾薑湯與之, 以復其陽. 若厥愈·足溫者, 更作芍藥甘草湯與之, 其脚則伸. 若胃氣不和, 譫語

者，少與調胃承氣湯。若重發汗，復加燒鍼者，四逆湯主之。

－ 甘草乾薑湯方：

甘草[四兩. 炙]，乾薑[二兩. 炮]

上咬咀，以水三升，煮取一升五合，去滓，分溫再服。

－ 芍藥甘草湯方：

白芍藥[四兩]，甘草[四兩. 炙]

上二味咬咀，以水三升，煮取一升半，去滓，分溫再服之。

－ 調胃承氣湯方：

大黃[四兩. 去皮・清酒浸]，甘草[二兩. 炙]，芒硝[半升]

上三味咬咀，以水三升，煮取一升，去滓，內芒硝更上火微煮，令沸，少少溫服。

－ 四逆湯方：

甘草[二兩. 炙]，乾薑[一兩半]，附子[一枚. 生用，去皮，破八片]

上三味咬咀，以水三升，煮取一升二合，去滓，分溫再服。強人可大附子一枚，乾薑三兩。

・ 제30조[031] 問曰，證象陽旦，按法治之而增劇，厥逆，咽中乾，兩脛拘急而譫語。師曰：言夜半手足當溫，兩腳當伸，後如師言。何以知此？答曰：寸口脈浮而大，浮則爲風，大則爲虛，風則生微熱，虛則兩脛攣。病證象桂枝，因加附子參其間，增桂令汗出，附子溫經，亡陽故也。厥逆咽中乾，煩燥，陽明內結，譫語，煩亂，更飲甘草乾薑湯。夜半陽氣還，兩足當熱，脛尚微拘急，重與芍藥甘草湯，爾乃脛伸，以承氣湯微瀉，則止其譫語，故知病可愈。

○ 太陽病 中篇 제31조~제127조[032~135]

・ 제31조[032] 太陽病，項背強几几，無汗，惡風，葛根湯主之。

－ 葛根湯方

葛根[四兩]，麻黃[三兩. 去節]，桂枝[二兩. 去皮]，芍藥[二兩. 切]，甘草[二兩. 炙]，生薑[三兩. 切]，大棗[十二枚. 擘]

上七味咬咀，以水一斗，先煮麻黃葛根，減二升，去沫，內諸藥，煮取三升，去滓，溫服一升，覆取微似汗，不須啜粥。餘如桂枝法將息及禁忌。

・ 제32조[033] 太陽與陽明合病者，必自下利，葛根湯主之。

・ 제33조[034] 太陽與陽明合病，不下利，但嘔者，葛根加半夏湯主之。

－ 葛根加半夏湯方：

葛根[四兩]，麻黃[三兩. 去節]，湯泡去黃汁，焙乾稱]，生薑[三兩. 切]，甘草[二兩.

炙], 芍藥[二兩], 桂枝[二兩. 去皮], 大棗[十二枚. 擘], 半夏[半斤. 洗]

上八味. 以水一斗, 先煮葛根・麻黃, 減二升, 去白沫, 內諸藥, 煮取三升, 去滓, 溫服一升, 覆取微似汗.

・ 제34조[035] 太陽病, 桂枝證, 醫反下之, 利遂不止, 脈促者, 表未解也; 喘而汗出者, 葛根黃連黃芩湯主之.

－ 葛根黃芩黃連湯方：

葛根[半斤], 甘草[二兩. 炙], 黃芩[二兩], 黃連[三兩]

上四味. 以水八升, 先煮葛根, 減二升, 內諸藥, 煮取二升, 去滓, 分溫再服.

・ 제35조[036] 太陽病, 頭痛發熱, 身疼, 腰痛, 骨節疼痛, 惡風, 無汗而喘者, 麻黃湯主之.

－ 麻黃湯方：

麻黃[二兩. 去節], 桂枝[二兩. 去皮], 甘草[一兩. 炙], 杏仁[七十個. 湯去皮尖]

上四味. 以水九升, 先煮麻黃, 減二升, 去上沫, 內諸藥, 煮取二升半, 去滓, 溫服八合, 覆取微似汗, 不須啜粥. 餘如桂枝法將息.

・ 제36조[037] 太陽與陽明合病, 喘而胸滿者, 不可下, 宜麻黃湯主之.

・ 제37조[038] 太陽病, 十日以去, 脈浮細而嗜臥者, 外已解也. 設胸滿脇痛者, 與小柴胡湯. 脈但浮者, 與麻黃湯.

・ 제38조[039] 太陽中風, 脈浮緊, 發熱惡寒, 身疼痛, 不汗出而煩躁者, 大青龍湯主之. 若脈微弱, 汗出惡風者, 不可服. 服之則厥逆, 筋惕肉瞤, 此爲逆也.

－ 大青龍湯方：

麻黃[六兩. 去節], 桂枝[二兩. 去皮], 甘草[二兩. 炙], 杏仁[四十個. 去皮尖], 生薑[三兩. 切], 大棗[十二枚. 擘], 石膏[如鷄子大. 碎]

上七味. 以水九升, 先煮麻黃, 減二升, 去上沫, 內諸藥, 煮取三升, 去滓, 溫服一升, 取微似汗. 汗出多者, 溫粉撲之. 一服汗者, 停後服. 汗多亡陽, 遂虛, 惡風煩躁, 不得眠也.

・ 제39조[040] 傷寒脈浮緩, 身不疼, 但重, 乍有輕時, 無少陰證者, 大青龍湯發之.

・ 제40조[041] 傷寒表不解, 心下有水氣, 乾嘔發熱而咳, 或渴, 或利, 或噎, 或小便不利, 小腹滿, 或喘者, 小青龍湯主之.

－ 小青龍湯方：

麻黃[三兩. 去節], 芍藥[三兩], 五味子[半升], 乾薑[三兩], 甘草[三兩. 炙], 桂枝

[三兩. 去皮], 半夏[半升. 湯洗], 細辛[三兩]

上八味. 以水一斗, 先煮麻黃, 減二升, 去上沫, 內諸藥, 煮取三升, 去滓, 溫服一升.

— 加減法：

若微利者, 去麻黃, 加薤白, 如雞子大, 熬令赤色. 若渴者, 去半夏, 加栝蒌根三兩;

若噎者, 去麻黃, 加附子一枚, 炮; 若小便不利, 少腹滿, 去麻黃加茯苓四兩; 若喘者, 去麻黃, 加杏仁半升, 去皮尖.

· 제41조[042] 傷寒, 心下有水氣, 咳而微喘, 發熱不渴. 服湯已渴者, 此寒去欲解也. 小青龍湯主之.

· 제42조[043] 太陽病, 外證未解, 脈浮弱者, 當以汗解, 宜桂枝湯.

· 제43조[044] 太陽病, 下之微喘者, 表未解故也. 桂枝加厚朴杏子湯主之.

· 제44조[045] 太陽病, 外證未解者, 不可下也, 下之爲逆. 欲解外者, 宜桂枝湯主之.

· 제45조[046] 太陽病, 先發汗不解, 而復下之, 脈浮者不愈. 浮爲在外, 而反下之, 故令不愈. 今脈浮, 故知在外, 當須解外則愈, 宜桂枝湯主之.

· 제46조[047] 太陽病, 脈浮緊, 無汗, 發熱, 身疼痛, 八九日不解, 表證仍在, 此當發其汗. 服藥已, 微除, 其人發煩目瞑. 劇者必衄, 衄乃解, 所以然者, 陽氣重故也. 麻黃湯主之.

· 제47조[048] 太陽病, 脈浮緊, 發熱身無汗, 自衄者愈.

· 제48조[049] 二陽并病, 太陽初得病時, 發其汗, 汗先出不徹, 因轉屬陽明, 續自微汗出, 不惡寒. 若太陽病證不罷者, 不可下, 下之爲逆, 如此可小發汗. 設面色緣緣正赤者, 陽氣怫鬱在表, 當解之. 熏之; 若發汗不徹, 不足言, 陽氣怫鬱不得越, 當汗不汗, 其人躁煩, 不知痛處, 乍在腹中, 乍在四肢, 按之不可得, 其人短氣, 但坐, 以汗出不徹故也, 更發汗則愈. 何以知汗出不徹, 以脈澁故知也.

· 제49조[050] 脈浮數者, 法當汗出而愈. 若下之, 身重心悸者, 不可發汗, 當自汗出乃解. 所以然者, 尺中脈微, 此裏虛, 須表裏實, 津液自和, 便自汗出愈.

· 제50조[051] 脈浮緊者, 法當身疼痛, 宜以汗解之. 假令尺中遲者, 不可發汗. 何以知之然? 以榮氣不足, 血少故也.

· 제51조[052] 脈浮者, 病在表, 可發汗, 宜麻黃湯.

· 제52조[053] 脈浮而數者, 可發汗, 宜麻黃湯.

· 제53조[054] 病常自汗出者, 此爲榮氣和. 榮氣和者, 外不諧, 以衛氣不共

榮氣和諧故爾。以榮行脈中，衛行脈外，復發其汗，營衛和則愈，宜桂枝湯。

· 제54조[055] 病人臟無他病，時發熱，自汗出，而不愈者，此衛氣不和也。先其時發汗則愈，宜桂枝湯主之。

· 제55조[056] 傷寒脈浮緊，不發汗，因致衄者，麻黃湯主之。

· 제56조[057] 傷寒不大便六七日，頭痛有熱者，與承氣湯。其小便清者，知不在裏，仍在表也，當須發汗；若頭痛者必衄，宜桂枝湯。

· 제57조[058] 傷寒發汗，解半日許，復煩，脈浮數者，可更發汗，宜桂枝湯主之。

· 제58조[059] 凡病若發汗·若吐·若下，若亡(趙本有“血·亡”二字)津液，陰陽自和者，必自愈。

· 제59조[060] 大下之後，復發汗，小便不利者，亡津液故也，勿治之，得小便利，必自愈。

· 제60조[061] 下之後，復發汗，必振寒，脈微細。所以然者，以內外俱虛故也。

· 제61조[062] 下之後，復發汗，晝日煩躁，不得眠，夜而安靜，不嘔不渴，無表證，脈沈微，身無大熱者，乾薑附子湯主之。

－ 乾薑附子湯方：

乾薑[一兩]，附子[一枚生用。去皮，破八片]

上二味，以水三升，煮取一升，去滓，頓服。

· 제62조[063] 發汗後，身疼痛，脈沈遲者，桂枝加芍藥生薑各一兩人參三兩新加湯主之

· 제63조[064] 發汗後，不可更行桂枝湯。汗出而喘，無大熱者，可與麻黃杏仁甘草石膏湯主之。

－ 麻黃杏仁甘草石膏湯方：

麻黃[四兩。去節]，杏仁[五十個。去皮尖]，甘草[二兩。炙]，石膏[半斤。碎，綿裹]

上四味。以水七升，先煮麻黃，減二升，去上沫，內諸藥，煮取二升，去滓，溫服一升。本云：黃耳杯。

· 제64조[065] 發汗過多，其人叉手自冒心，心下悸，欲得安者，桂枝甘草湯主之。

－ 桂枝甘草湯方：

桂枝[四兩。去皮]，甘草[二兩。炙]

上二味，以水三升，煮取一升，去滓，頓服。

· 제65조[066] 發汗後，其人臍下悸者，欲作奔豚，茯苓桂枝甘草大棗湯主之。

－ 茯苓桂枝甘草大棗湯方：

茯苓[半斤]，甘草[二兩. 炙]，大棗[十五枚. 擘]，桂枝[四兩. 去皮]

上四味. 以甘爛水一斗，先煮茯苓，減二升，內諸藥，煮取三升，去滓，溫服一升，日三服. 作甘爛水法，取水二斗，置大盆內，以杓揚之，水上有珠子五六千顆相逐，取用之。

· 제66조[067] 發汗後，腹脹滿者，厚朴生薑甘草半夏人參湯主之。

－ 厚朴生薑甘草半夏人參湯方：

厚朴[半斤. 去皮，炙]，生薑[半斤. 切]，半夏[半升. 洗]，人參[一兩]，甘草[二兩. 炙]

上五味，以水一斗，煮取三升，去滓，溫服一升，日三服。

· 제67조[068] 傷寒若吐若下後，心下逆滿，氣上衝胸，起則頭眩，脈沈緊，發汗則動經，身爲振振搖者，茯苓桂枝白朮甘草湯主之。

－ 茯苓桂枝白朮甘草湯方：

茯苓[四兩]，桂枝[三兩. 去皮]，白朮[二兩]，甘草[二兩. 炙]

上四味，以水六升，煮取三升，去滓，分溫三服。

· 제68조[069] 發汗，病不解，反惡寒者，虛故也，芍藥甘草附子湯主之。

－ 芍藥甘草附子湯方：

芍藥[三兩]，甘草[三兩. 炙]，附子[一枚. 炮，去皮，破八片]

已上三味，以水五升，煮取一升五合，去滓，分溫服，疑非仲景意。

· 제69조[070] 發汗若下之，病仍不解，煩躁者，茯苓四逆湯主之。

－ 茯苓四逆湯方：

茯苓[六兩]，人參[一兩]，甘草[二兩. 炙]，乾薑[一兩半]，附子[一枚. 生用，去皮，破八片]

上五味，以水五升，煮取三升，去滓，溫服七合，日三服。

· 제70조[071] 發汗後，惡寒者，虛故也；不惡寒，但熱者，實也。當和胃氣，與調胃承氣湯。

· 제71조[072] 太陽病，發汗後，大汗出，胃中乾，煩躁不得眠，欲得飲水者，少少與飲之，令胃氣和則愈。若脈浮，小便不利，微熱消渴者，與五苓散主之。

－ 五苓散方：

猪苓[十八銖. 去皮]，澤瀉[一兩六銖半]，茯苓[十八銖]，桂(趙本有“枝”字)[半兩. 去皮]，白朮[十八銖]

上五味爲末，以白飲和，服方寸匕，日三服，多飲暖水，汗出愈。

・ 제72조[073] 發汗已，脈浮數，煩渴者，五苓散主之。

・ 제73조[074] 傷寒汗出而渴者，五苓散主之。不渴者，茯苓甘草湯主之。

－ 茯苓甘草湯方：

茯苓[二兩]，桂枝[二兩. 去皮]，生薑[三兩. 切]，甘草[一兩. 炙]

上四味，以水四升，煮取二升，去滓，分溫三服。

・ 제74조[075] 中風發熱，六七日不解而煩，有表裏證，渴欲飲水，水入則吐者，名曰水逆。五苓散主之。

* 제75조[076] 未持脈時，病人手叉自冒心，師因教試令咳而不咳者，此必兩耳聾無聞也。所以然者，以重發汗，虛故如此。

* 제75조[077] 發汗後，飲水多，必喘，以水灌之，亦喘。

* 제76조[078] 發汗後，水藥不得入口爲逆，若更發汗，必吐下不止。

* 제76조[079] 發汗吐下後，虛煩不得眠；若劇者，必反復顛倒，心中懊憹，梔子豉湯主之。

－ 梔子豉湯方：

梔子[十四枚. 擘]，香豉[四合. 綿裹]

上二味，以水四升，先煮梔子，得二升半，內豉，煮取一升半，去滓，分爲二服，溫進一服，得吐者，止後服

* 제76조[080] 若少氣者，梔子甘草豉湯主之。若嘔者，梔子生薑豉湯主之。

－ 梔子甘草豉湯方：

於梔子豉湯方內，加入甘草二兩，餘依前法。得吐，止後服。

－ 梔子生薑豉湯方：

於梔子豉湯方內，加入生薑五兩，餘依前法。得吐，止後服。

・ 제77조[081] 發汗，若下之而煩熱，胸中窒者，梔子豉湯主之

・ 제78조[082] 傷寒五六日，大下之後，身熱不去，心中結痛者，未欲解也，梔子豉湯主之

・ 제79조[083] 傷寒下後，心煩，腹滿，臥起不安者，梔子厚朴湯主之。

－ 梔子厚朴湯方：

梔子[十四枚. 擘]，厚朴[四兩. 薑炙]，枳實[四枚. 水浸，去穰，炒]

已上三味，以水三升半，煮取一升半，去滓，分二服。溫進一服。得吐者，止後服。

・ 제80조[084] 傷寒，醫以丸藥大下之，身熱不去，微煩者，梔子乾薑湯主之

－ 梔子乾薑湯方：

梔子[十四枚. 擘], 乾薑[二兩]

上二味, 以水三升半, 煮取一升半, 去滓, 分二服. 溫進一服, 得吐者, 止後服.

· 제81조[085] 凡用梔子湯, 病人舊微瀉者, 不可與服之.

· 제82조[086] 太陽病, 發汗, 汗出不解, 其人仍發熱, 心下悸, 頭眩, 身瞤動, 振振欲擗地者, 真武湯主之.

· 제83조[087] 咽喉乾躁者, 不可發汗.

· 제84조[088] 淋家不可發汗, 發汗必便血.

· 제85조[089] 瘡家雖身疼痛, 不可發汗, 發汗則瘡.

· 제86조[090] 衄家不可發汗, 汗出必額上陷, 脈急緊, 直視不能胸, 不得眠.

· 제87조[091] 亡血家, 不可發汗, 發汗則寒慄而振.

· 제88조[092] 汗家重發汗, 必恍惚心亂, 小便已, 陰疼, 與禹餘糧丸, 闕.

· 제89조[093] 病人有寒, 復發汗, 胃中冷, 必吐蚘.

· 제90조[094] 本發汗而復下之, 此爲逆也; 若先發汗, 治不爲逆. 本先下之而反汗之爲逆; 若先下之, 治不爲逆.

· 제91조[095] 傷寒醫下之, 續得下利, 清穀不止, 身疼痛者, 急當救裏; 後身疼痛, 清便自調者, 急當救表. 救裏宜四逆湯; 救表宜桂枝湯.

· 제92조[096] 病發熱, 頭痛, 脈反沈, 若不差, 身體疼痛, 當救其裏, 宜四逆湯.

· 제93조[097] 太陽病, 先下之而不愈, 因復發汗, 以此表裏俱虛, 其人因致冒, 冒家汗出自愈. 所以然者, 汗出表和故也. 得裏未和, 然後復下之.

· 제94조[098] 太陽病未解, 脈陰陽俱停, 必先振慄, 汗出而解. 但陽脈微者, 先汗出而解; 但陰脈微者, 下之而解. 若欲下之, 宜調胃承氣湯主之.

· 제95조[099] 太陽病, 發熱汗出者, 此爲榮弱衛強, 故使汗出, 欲救邪風者, 宜桂枝湯.

· 제96조[100] 傷寒五六日, 中風, 往來寒熱, 胸脇苦滿, 默默不欲飲食, 心煩喜嘔, 或胸中煩而不嘔, 或渴, 或腹中痛, 或脇下痞硬, 或心下悸, 小便不利, 或不渴, 身有微熱, 或咳者, 與小柴胡湯主之.

— 小柴胡湯方 :

柴胡[半斤], 黃芩[三兩], 人參[三兩], 甘草[三兩. 炙], 半夏[半升. 洗], 生薑[三兩. 切], 大棗[十三枚. 擘]

上七味, 以水一斗二升, 煮取六升, 去滓, 再煎, 取三升, 溫服一升, 日三服.

— 後加減法 :

若胸中煩而不嘔，去半夏・人參，加栝蒌實一枚。若渴者，去半夏，加人參，合前成四兩半，栝蒌根四兩。若腹中痛者，去黃芩，加芍藥三兩。若脇下痞鞭，去大棗，加牡蠣四兩。若心下悸，小便不利者，去黃芩，加茯苓四兩。若不渴，外有微熱者，去人參，加桂（趙本有“枝”字）三兩，溫覆取微汗愈。若咳者，去人參・大棗・生薑，加五味子半升，乾薑二兩。

* 제97조[101] 血弱氣盡，腠理開，邪氣因入，與正氣相搏，結於脇下，正邪分爭，往來寒熱，休作有時，默默不欲飲食。臟腑相連，其痛必下，邪高痛下，故使嘔也。小柴胡湯主之。

* 제97조[102] 服柴胡湯已，渴者，屬陽明也，以法治之。

・ 제98조[103] 得病六七日，脈遲浮弱，惡風寒，手足溫，醫二三下之，不能食，而脇下滿痛，面目及身黃，頸項強，小便難者，與柴胡湯。後必下重。本渴，而飲水嘔者，柴胡湯不中與也。食穀者噦。

・ 제99조[104] 傷寒四五日，身熱惡風，頸項強，脇下滿，手足溫而渴者，小柴胡湯主之。

・ 제100조[105] 傷寒，陽脈澁，陰脈弦，法當腹中急痛者，先與小建中湯；不差者，與小柴胡湯主之。

－ 小建中湯方：

桂枝[三兩。去皮]，甘草[三兩。炙]，大棗[十二枚。擘]，芍藥[六兩]，生薑[三兩。切]，膠飴[一升]

上六味，以水七升，煮取三升，去滓，內膠飴，更上微火，消解，溫服一升，日三服。嘔家不可用建中湯，以甜故也。

* 제101조[106] 傷寒中風，有柴胡證，但見一證便是，不必悉具。

* 제101조[107] 凡柴胡湯病證而下之，若柴胡證不罷者，復與柴胡湯，必蒸蒸而振，却發熱汗出而解。

・ 제102조[108] 傷寒二三日，心中悸而煩者，小建中湯主之。

・ 제103조[109] 太陽病，過經十餘日，反二三下之，後四五日，柴胡證仍在者，先與小柴胡湯。嘔不止，心下急，鬱鬱微煩者，爲未解也，與大柴胡湯下之則愈。

－ 大柴胡湯方：

柴胡[半斤]，黃芩[三兩]，芍藥[三兩]，半夏[半升。洗]，生薑[五兩。切]，枳實[四枚。炙]，大棗[十二枚。擘]，大黃[二兩]

上八味，以水一斗二升，煮取六升，去滓，再煎，溫服一升，日三服。一方用大黃二兩。

若不加大黃，恐不爲大柴胡湯也。

· 제104조[110] 傷寒十三日不解，胸脇滿而嘔，日晡所發潮熱，已而微利。此本柴胡證，下之以不得利，今反利者，知醫以丸藥下之，非其治也。潮熱者實也，先宜小柴胡湯以解外，後以柴胡加芒硝湯主之。

－ 柴胡加芒硝湯方：

於小柴胡湯方內，加芒硝六兩，餘依前法。服不解，更服。

· 제105조[111] 傷寒十三日不解，過經，譫語者，以有熱也，當以湯下之。若小便利者，大便當鞭，而反下利，脈調和者，知醫以丸藥下之，非其治也。若自下利者，脈當微厥，今反和者，此爲內實也，調胃承氣湯主之。

· 제106조[112] 太陽病不解，熱結膀胱，其人如狂，血自下，下者愈。其外不解者，尚未可攻，當先解外。外解已，但小腹急結者，乃可攻之，宜桃核承氣湯方。

－ 桃核承氣湯方：

桃仁[五十個。去皮尖]，桂枝[二兩。去皮]，大黃[四兩]，芒硝[二兩]，甘草[二兩。炙]

上五味，以水七升，煮取二升半，去滓，內芒硝，更上火微沸。下火，先食溫服五合，日三服。當微利。

· 제107조[113] 傷寒八九日，下之，胸滿煩驚，小便不利，譫語，一身盡重，不可轉側者，柴胡加龍骨牡蠣湯主之。

－ 柴胡加龍骨牡蠣湯方：

半夏[二合。洗]，大棗[六枚]，柴胡[四兩]，生薑[一兩半]，人參[一兩半]，龍骨[一兩半]，鉛丹[一兩半]，桂枝[一兩半。去皮]，茯苓[一兩半]，大黃[二兩]，牡蠣[一兩半。煨]

上十一味，以水八升，煮取四升，內大黃切如碁子，更煮一二沸，去滓，溫服一升。

· 제108조[114] 傷寒腹滿譫語，寸口脈浮而緊，此肝乘脾也，名曰縱，刺期門。

· 제109조[115] 傷寒發熱，晝晝惡寒，大渴欲飲水，其腹必滿，自汗出，小便利，其病欲解，此肝乘肺也，名曰橫，刺期門。

· 제110조[116] 太陽病二日，反躁，反熨其背，而大汗出，大熱入胃，胃中水竭，躁煩，必發譫語，十餘日，振慄。自下利者，此爲欲解也。故其汗，從腰以下不得汗，欲小便不得，反嘔，欲失溲，足下惡風，大便鞭，小便當數而反不數及不多，大便已，頭卓然而痛，其人足心必熱，穀氣下流故也。

· 제111조[117] 太陽病中風，以火劫發汗，邪風被火熱，血氣流溢，失其常度，兩陽相熏灼，其身發黃。陽盛則欲衄，陰虛則小便難，陰陽俱虛竭，身體則枯燥。但頭汗出，劑頸而還，腹滿微喘，口乾咽爛，或不大便，久則譫語，甚者至噦，手足躁擾，捻衣摸床，小便利者，其人可治。

· 제112조[118] 傷寒脈浮，醫以火迫劫之，亡陽，必驚狂，起臥不安者，桂枝去芍藥加燭漆牡蠣龍骨救逆湯主之。

－ 桂枝去芍藥加蜀漆龍骨牡蠣救逆湯方：

桂枝[三兩. 去皮]，甘草[二兩. 炙]，生薑[三兩. 切]，牡蠣[五兩. 熬]，龍骨[四兩]，大棗[十二枚. 擘]，蜀漆[三兩. 洗去脚(趙本作腥)]

上爲末。以水一斗二升，先煮蜀漆，減二升，內諸藥，煮取三升，去滓，溫服一升。

· 제113조[119] 形作傷寒，其脈不弦緊而弱。弱者必渴，被火者必譫語。弱者，發熱。脈浮，解之當汗出。愈。

· 제114조[120] 太陽病，以火熏之，不得汗，其人必躁，到經不解，必清血，名爲火邪。

· 제115조[121] 脈浮熱甚，反灸之，此爲實。實以虛治，因火而動，必咽燥吐血。

* 제116조[122] 微數之脈，慎不可灸，因火爲邪，則爲煩逆，迫虛逐實，血散脈中，火氣雖微，內攻有力，焦骨傷筋，血難復也。

* 제116조[123] 脈浮，宜以汗解，用火灸之，邪無從出，因火而盛，病從腰以下必重而痺，名火逆也。

* 제116조[124] 欲自解者，必當先煩，乃有汗而解。何以知之？脈浮，故知汗出解也。

· 제117조[125] 燒鍼令其汗，鍼處被寒，核起而赤者，必發奔豚。氣從少腹上衝心者，灸其核上各一壯，與桂枝加桂湯，更加桂三兩。

－ 桂枝加桂湯方：

於桂枝湯方內，更加桂二兩，共五兩，餘依前法。

· 제118조[126] 火逆，下之，因燒鍼煩躁者，桂枝甘草龍骨牡蠣湯主之。

－ 桂枝甘草龍骨牡蠣湯方：

桂枝[一兩]，甘草[二兩]，牡蠣[二兩. 熬]，龍骨[二兩]

上爲末，以水五升，煮取二升半，去滓，溫服八合，日三服。

· 제119조[127] 太陽傷寒者，加溫鍼，必驚也。

· 제120조[128] 太陽病，當惡寒發熱，今自汗出，不惡寒發熱，關上脈細數

者，以醫吐之過也。一二日吐之者，腹中饑，口不能食；三四日吐之者，不喜糜粥，飲食冷食，朝食暮吐，以醫吐之所致也，此爲小逆。

· 제121조[129] 太陽病吐之，但太陽病當惡寒，今反不惡寒，不欲近衣，此爲吐之內煩也。

· 제122조[130] 病人脈數，數爲熱，當消穀引食，而反吐者，此以發汗，令陽氣微，膈氣虛，脈內數也。數爲客熱，不能消穀，以胃中虛冷，故吐也。

· 제123조[131] 太陽病，過經十餘日，心中溫溫欲吐，而胸中痛，大便反溏，腹微滿，鬱鬱微煩。先此時，自極吐下者，與調胃承氣湯。若不爾者，不可與。但欲嘔，胸中痛，微溏者，此非柴胡證，以嘔故知極吐下也。

· 제124조[132] 太陽病六七日，表證仍在，脈微而沈，反不結胸，其人發狂者，以熱在下焦，少腹當鞭滿，小便自利者，下血乃愈。所以然者，以太陽隨經，瘀熱在裏故也。抵當湯主之。

－ 抵當湯方：

水蛭[三十個。熬]，蠭蟲[三十個。熬，去翅足]，桃仁[二十個。去皮尖]，大黃[三兩。酒浸]

上四味爲末，以水五升，煮取三升，去滓，溫服一升。不下再服。

· 제125조[133] 太陽病，身黃，脈沈結，少腹鞭，小便不利者，爲無血也；小便自利，其人如狂者，血證諦也，抵當湯主之。

· 제126조[134] 傷寒有熱，少腹滿，應小便不利；今反利者，爲有血也，當下之，不可餘藥，宜抵當丸。

－ 抵當丸方：

水蛭[二十個]，蠭蟲[二十五個]，桃仁[二十個。去皮尖]，大黃[三兩]

上四味，杵分爲四丸，以水一升，煮一丸，取七合服之，晡時，當下血；若不下者，更服。

· 제127조[135] 太陽病，小便利者，以飲水多，必心下悸。小便少者，必苦裏急也。

○ 太陽病 下篇 제128조~제178조[136~187]

* 제128조[136] 問曰：病有結胸，有藏結，其狀何如？答曰：按之痛，寸脈浮，關脈沈，名曰結胸也。

* 제129조[136] 何謂藏結？答曰：如結胸狀，飲食如故，時時下利，寸脈浮，關脈小細沈緊，名曰藏結。舌上白胎滑者，難治。

· 제130조[137] 藏結無陽證，不往來寒熱，其人反靜，舌上胎滑者，不可攻也。

* 제131조[138] 病發於陽而反下之，熱入，因作結胸；病發於陰而反下之，因作痞。所以成結胸者，以下之太早故也。

* 제131조[139] 結胸者，項亦強，如柔痙狀。下之則和，宜大陷胸丸方。

－ 大陷胸丸方：

大黃[半斤]，葶藶[半升·熬]，芒硝[半升]，杏仁[半升·去皮尖，熬黑]

上四味。搗篩二味，內杏仁·芒硝，合研如脂，和散，取如彈丸一枚；別搗甘遂末一錢匕，白蜜二合，水二升，煮取一升，溫頓服之，一宿乃下，如不下更服，取下爲效，禁如藥法。

· 제132조[140] 結胸證，其脈浮大者，不可下，下之則死。

· 제133조[141] 結胸證悉具，煩躁者，亦死。

· 제134조[142] 太陽病，脈浮而動數，浮則爲風，數則爲熱，動則爲痛，數則爲虛，頭痛發熱，微盜汗出而反惡寒者，表未解也。醫反下之，動數變遲，膈內拒痛，胃中空虛，客氣動膈，短氣躁煩，心中懊憹，陽氣內陷，心下因鞭，則爲結胸，大陷胸湯主之。若不結胸，但頭汗出，餘處無汗，劑頸而還，小便不利，身必發黃也。

－ 大陷胸湯方：

大黃[六兩·去皮]，芒硝[一升]，甘遂[一錢]

上三味。以水六升，先煮大黃，取二升，去滓，內芒硝，煮一兩沸，內甘遂末，溫服一升，得快利，止後服。

· 제135조[143] 傷寒六七日，結胸熱實，脈沈而緊，心下痛，按之石鞭者，大陷胸湯主之。

· 제136조[144] 傷寒十餘日，熱結在裏，復往來寒熱者，與大柴胡湯。但結胸無大熱者，此爲水結在胸脇也，但頭微汗出者，大陷胸湯主之。

· 제137조[145] 太陽病，重發汗，而復下之，不大便五六日，舌上燥而渴，日晡所小有潮熱，從心下至少腹，鞭滿而痛，不可近者，大陷胸湯主之。

· 제138조[146] 小結胸病，正在心下，按之則痛，脈浮滑者，小陷胸湯主之。

－ 小陷胸湯方：

黃連[一兩]，半夏[半升·洗]，栝蒌實[大者一個]

上三味，以水六升，先煮栝蒌取三升，去滓，內諸藥，煮取二升，去滓，分溫三服。

· 제139조[147] 太陽病二三日，不能臥，但欲起，心下必結，脈微弱者，此

本有寒分也。反下之，若利止，必作結胸；未止者，四日復下之，此作協熱利也。

・ 제140조[148] 太陽病下之，其脈促，不結胸者，此爲欲解也。脈浮者，必結胸也；脈緊者，必咽痛；脈弦者，必兩脇拘急；脈細數者，頭痛未止；脈沈緊者，必欲嘔；脈沈滑者，協熱利；脈浮滑者，必下血。

・ 제141조[149] 病在陽，應以汗解之，反以冷水澀之，若灌之，其熱被却不得去，彌更益煩，肉上粟起，意欲飲水，反不渴者，服文蛤散。若不差者，與五苓散。寒實結胸，無熱證者，與三物小陷胸湯，白散亦可服。

－ 文蛤散方：

文蛤[五兩]

上一味爲散，以沸湯和一錢匕服，湯用五合。

－ 白散方：

桔梗[三分]，巴豆[一分。去皮心，熬黑，研如脂]，貝母[三分]

上三味爲末，內巴豆，更於臼中杵之，以白飲和服。強人半錢，羸者減之。病在膈上必吐，在膈下必利，不利進熱粥一杯，利過不止，進冷粥一杯。身熱，皮粟不解，欲引衣自覆者，若水以澀之。洗之，益令熱却不得出，當汗而不汗，則煩。假令汗出已，腹中痛，與芍藥三兩如上法。

・ 제142조[150] 太陽與少陽并病，頭項強痛，或眩冒，時如結胸，心下痞鞭者，當刺大椎第一間，肺俞・肝俞，慎不可發汗，發汗則譫語。脈弦，五六日，譫語不止，當刺期門。

・ 제143조[151] 婦人中風，發熱惡寒，經水適來，得之七八日，熱除而脈遲身涼，胸脇下滿，如結胸狀，譫語者，此爲熱入血室也，當刺期門，隨其實而瀉之。

・ 제144조[152] 婦人中風，七八日，續得寒熱，發作有時，經水適斷者，此爲熱入血室，其血必結，故使如瘧狀，發作有時，小柴胡湯主之。

・ 제145조[153] 婦人傷寒發熱，經水適來，晝日明了，暮則譫語，如見鬼狀者，此爲熱入血室。無犯胃氣及上二焦，必自愈。

・ 제146조[154] 傷寒六七日，發熱微惡寒，支節煩疼，微嘔，心下支結，外證未去者，柴胡桂枝湯主之。

－ 柴胡桂枝湯方：

桂枝[去皮]，黃芩・人參[各一兩半]，甘草[一兩。炙]，半夏[二合半]，芍藥[一兩半]，大棗[六枚。擘]，生薑[一兩半。切]，柴胡[四兩]

上九味，以水七升，煮取三升，去滓，溫服。

· 제147조[155] 傷寒五六日，已發汗而復下之，胸脇滿，微結，小便不利，渴而不嘔，但頭汗出，往來寒熱，心煩者，此爲未解也，柴胡桂枝乾薑湯主之。

－ 柴胡桂枝乾薑湯方：

柴胡[半斤]，桂枝[三兩. 去皮]，乾薑[三兩]，栝蒌根[四兩]，黃芩[三兩]，牡蠣[三兩. 熬]，甘草[二兩. 炙]

上七味，以水一斗二升，煮取六升，去滓，再煎，取三升，溫服一升，日三服。初服微煩，復服汗出，便愈。

· 제148조[156] 傷寒五六日，頭汗出，微惡寒，手足冷，心下滿，口不欲食，大便鞭，脈細者，此爲陽微結，必有表復有裏也。脈沈，亦在裏也。汗出爲陽微，假令純陰結，不得復有外證，悉入在裏，此爲半在裏半在外也。脈雖沈緊，不得爲少陰病，所以然者，陰不得有汗，今頭汗出，故知非少陰也。可與小柴胡湯。設不了了者，得屎而解。

· 제149조[157] 傷寒五六日，嘔而發熱者，柴胡湯證具，而以他藥下之，柴胡證仍在者，復與柴胡湯。此雖已下之，不爲逆，必蒸蒸而振，却發熱汗出而解。若心下滿而鞭痛者，此爲結胸也，大陷胸湯主之；但滿而不痛者，此爲痞，柴胡不中與之，宜半夏瀉心湯。

－ 半夏瀉心湯方：

半夏[半升. 洗]，黃芩·乾薑·人參[已上各三兩]，黃連[一兩]，大棗[十二枚. 擘]，甘草[三兩. 炙]

上七味，以水一斗，煮取六升，去滓，再煮取三升，溫服一升，日三服。

· 제150조[158] 太陽少陽并病，而反下之，成結胸，心下鞭，下利不止，水漿不下，其人心煩。

· 제151조[159] 脈浮而緊，而復下之，緊反入裏，則作痞。按之自濡，但氣痞耳。

· 제152조[160] 太陽中風，下利，嘔逆，表解者，乃可攻之。其人^熱熱汗出，發作有時，頭痛，心下痞，鞭滿，引脇下痛，乾嘔，短氣，汗出，不惡寒者，此表解裏未和也，十棗湯主之。

－ 十棗湯方：

芫花[熬]·甘遂·大戟. 大棗[十枚. 擘]

上三味等分，各別搗爲散。以水一升半，先煮大棗肥者十枚，取八合，去滓，內藥末。強人服一錢匕，羸人服半錢，溫服之，平旦服。若下少病不除者，明日更服，加半錢，得快下利後，糜粥自養。

· 제153조[161] 太陽病，醫發汗，遂發熱惡寒，因復下之，心下痞，表裏俱虛，陰陽氣并竭，無陽則陰獨，復加燒鍼，因胸煩，面色青黃，膚瞶者，難治；今色微黃，手足溫者，易愈。

· 제154조[162] 心下痞，按之濡，其脈關上浮者，大黃黃連瀉心湯主之。

－ 大黃黃連瀉心湯方：

大黃[二兩]，黃連[一兩]

上二味，以麻沸湯二升漬之，須臾絞去滓，分溫再服。

· 제155조[163] 心下痞，而復惡寒，汗出者，附子瀉心湯主之。

－ 附子瀉心湯方：

大黃[二兩]，黃連·黃芩[各一兩]，附子[一枚。炮，去皮，破，別煮取汁]

上四味，切三味，以麻沸湯二升漬之，須臾，絞去滓，內附子汁，分溫再服。

· 제156조[164] 本以下之，故心下痞，與瀉心湯；痞不解，其人渴而口燥煩，小便不利者，五苓散主之。

· 제157조[165] 傷寒汗出，解之後，胃中不和，心下痞鞭，乾噯食臭，脇下有水氣，腹中雷鳴下利者，生薑瀉心湯主之。

－ 生薑瀉心湯方：

生薑[四兩。切]，甘草[三兩。炙]，人參[三兩]，乾薑[一兩]，黃芩[三兩]，半夏[半升。洗]，黃連[一兩]，大棗[十二枚]

上八味，以水一斗，煮取六升，去滓，再煎取三升，溫服一升，日三服。

· 제158조[166] 傷寒中風，醫反下之，其人下利，日數十行，穀不化，腹中雷鳴，心下痞鞭而滿，乾嘔，心煩不得安。醫見心下痞，謂病不盡，復下之，其痞益甚，此非結熱，但以胃中虛，客氣上逆，故使鞭也，甘草瀉心湯主之。

－ 甘草瀉心湯方：

甘草[四兩]，黃芩[三兩]，乾薑[三兩]，半夏[半升。洗]，黃連[一兩]，大棗[十二枚。擘]

上六味，以水一斗，煮取六升，去滓，再煎取三升，溫服一升，日三服。

· 제159조[167] 傷寒服湯藥，下利不止，心下痞鞭。服瀉心湯已，復以他藥下之，利不止，醫以理中與之，利益甚。理中者，理中焦，此利在下焦，赤石脂禹餘糧湯主之。復利不止者，當利其小便。

－ 赤石脂禹餘糧湯方：

赤石脂[一斤。碎]，禹餘糧[一斤。碎]

以上二味，以水六升，煮取二升，去滓，三服。

· 제160조[168] 傷寒吐下後發汗，虛煩，脈甚微。八九日，心下痞鞭，脇下痛，氣上衝咽喉，眩冒。經脈動惕者，久而成痿。

· 제161조[169] 傷寒發汗，若吐若下，解後，心下痞鞭，噫氣不除者，旋覆代赭石湯主之。

－ 旋覆代赭石湯方：

旋覆花[三兩]，人參[二兩]，生薑[五兩. 切]，半夏[半升. 洗]，代赭石[一兩]，大棗[十二枚. 擘]，甘草[三兩. 炙]

上七味，以水一斗，煮取六升，去滓，再煎，取三升，溫服一升，日三服。

· 제162조[170] 下後，不可更行桂枝湯。若汗出而喘，無大熱者，可與麻黃杏子甘草石膏湯。

· 제163조[171] 太陽病，外證未除而數下之，遂協熱而利。利下不止，心下痞鞭，表裏不解者，桂枝人參湯主之。

－ 桂枝人參湯方：

桂枝[四兩. 去皮]，甘草[四兩. 炙]，白朮[三兩]，人參[三兩]，乾薑[三兩]

上五味，以水九升，先煮四味，取五升，內桂更煮，取三升，溫服一升，日再・夜一服。

· 제164조[172] 傷寒大下後，復發汗，心下痞，惡寒者，表未解也，不可攻痞，當先解表，表解乃可攻痞。解表宜桂枝湯，攻痞宜大黃黃連瀉心湯。

· 제165조[173] 傷寒，發熱，汗出不解，心下痞鞭，嘔吐而不利者，大柴胡湯主之。

· 제166조[174] 病如桂枝證，頭不痛，項不强，寸脈微浮，胸中痞鞭，氣上衝咽喉，不得息者，此爲胸有寒也，當吐之，宜瓜蒂散。

－ 瓜蒂散方：

瓜蒂[一分. 熬黃]，赤小豆[一分]

上二味，各別搗篩，爲散已，合治之，取一錢匕。以香豉一合，用熱湯七合，煮作稀糜，去滓，取汁和散，溫頓服之。不吐者，少少加，得快吐乃止。諸亡血・虛家，不可與瓜蒂散。

· 제167조[175] 病脇下素有痞，連在臍傍，痛引少腹，入陰筋者，此名藏結，死。

· 제168조[176] 傷寒病，若吐・若下後，七八日不解，熱結在裏，表裏俱熱，時時惡風，大渴，舌上乾燥而煩，欲飲水數升者，白虎加人參湯主之。

· 제169조[177] 傷寒無大熱，口燥渴，心煩，背微惡寒者，白虎加人參湯主之。

· 제170조[178] 傷寒脈浮，發熱無汗，其表不解者，不可與白虎湯。渴欲飲水，無表證者，白虎加人參湯主之。

· 제171조[179] 太陽少陽并病，心下鞭，頸項強而眩者，當刺大椎·肺俞·肝俞，慎勿下之。

· 제172조[180] 太陽與少陽合病，自下利者，與黃芩湯；若嘔者，黃芩加半夏生薑湯主之。

－ 黃芩湯方：

黃芩[三兩]，甘草[二兩·炙]，芍藥[二兩]，大棗[十二枚·擘]

上四味，以水一斗，煮取三升，去滓，溫服一升，日再夜一服。若嘔者，加半夏半升，生薑三兩。

－ 黃芩加半夏生薑湯方：

於黃芩湯方內，加半夏半升，生薑一兩半，餘依黃芩湯法服。

· 제173조[181] 傷寒胸中有熱，胃中有邪氣，腹中痛，欲嘔吐者，黃連湯主之。

－ 黃連湯方：

黃連·甘草[炙]·乾薑·桂枝[去皮·各三兩]，人參[二兩]，半夏[半升·洗]，大棗[十二枚·擘]

上七味，以水一斗，煮取六升，去滓，溫服一升，日三服，夜二服。

* 제174조[182] 傷寒八九日，風濕相搏，身體疼煩，不能自轉側，不嘔不渴，脈浮虛而濡者，桂枝附子湯主之。

－ 桂枝附子湯方：（方載原書183條下，今移至此）

桂枝[四兩·去皮]，附子[三枚·炮，去皮，破八片]，生薑[三兩·切]，甘草[二兩·炙]，大棗[十二枚·擘]

上五味，以水六升，煮取二升，去滓，分溫三服。

* 제174조[183] 若其人大便鞭，小便自利者，去桂枝加白朮湯主之。

－ 去桂加白朮湯方：（本方成本未錄，今依趙本補入）

附子[三枚·炮，去皮，破]，白朮[四兩]，生薑[三兩·切]，甘草[二兩·炙]，大棗[十二枚·擘]

上五味，以水六升，煮取兩升，去滓，分溫三服。初一服，其人身如痺，半日許復服之，三服都盡，其人如冒狀，勿怪。此以附子·朮并走皮內，逐水氣未得除，故使之耳，法當加桂四兩。此本一方二法：以大便鞭·小便自利，去桂也；以大便不鞭·小便不利，當加桂。附子三枚，恐多也。虛弱家及產婦，宜減之。

· 제175조[184] 風濕相搏，骨節煩疼，掣痛，不得屈伸，近之則痛劇，汗出短氣，小便不利，惡風不欲去衣，或身微腫者，甘草附子湯主之。

－ 甘草附子湯方：

甘草[二兩. 炙]，附子[二枚. 炮，去皮，破]，白朮[二兩]，桂枝[四兩. 去皮]

上四味，以水六升，煮取三升，去滓，溫服一升，日三服。初服得微汗則解。能食，汗出復煩者，服五合，恐一升多者，宜服六七合爲妙。

· 제176조[185] 傷寒脈浮滑，此表有熱·裏有寒，白虎湯主之。

－ 白虎湯方：

知母[六兩]，石膏[一斤. 碎]，甘草[二兩]，粳米[六合]

上四味，以水一斗，煮米熟，湯成，去滓，溫服一升，日三服。

· 제177조[186] 傷寒脈結代，心動悸，炙甘草湯主之。

－ 炙甘草湯方：

炙甘草[四兩. 炙]，生薑[三兩. 切]，桂枝[三兩. 去皮]，人參[二兩]，生地黃[一斤]，阿膠[二兩]，麥門冬[半升. 去心]，麻子仁[半升]，大棗[十二枚. 擘]

上九味. 以清酒七升，水八升，先煮八味，取三升，去滓，內膠烱消盡，溫服一升，日三服。一名復脈湯。

· 제178조[187] 脈按之來緩，而時一止復來者，名曰結。又脈來動而中止，更來小數，中有還者反動，名曰結陰也；脈來動而中止，不能自還，因而復動，名曰代陰也。得此脈者，必難治。

□ 陽明病 제179조~제262조[188~275]

* 제179조[188] 問曰：病有太陽陽明，有正陽陽明，有少陽陽明，何謂也？答曰：太陽陽明者，脾約是也。

* 제179조[189] 正陽陽明者，胃家實是也。

* 제179조[190] 少陽陽明者，發汗，利小便已，胃中燥煩實，大便難是也。

· 제180조[191] 陽明之爲病，胃家實(趙本有“是”字)也。

· 제181조[192] 問曰：何緣得陽明病？答曰：太陽病發汗·若下·若利小便，此亡津液，胃中乾燥，因轉屬陽明。不更衣，內實，大便難者，此名陽明也。

· 제182조[193] 問曰：陽明病，外證云何？答曰：身熱，汗自出，不惡寒，反惡熱也。

· 제183조[194] 問曰：病有得之一日，不發熱而惡寒者，何也？答曰：雖得之一日，惡寒將自罷，卽汗出而惡熱也。

· 제184조[195] 問曰：惡寒何故自罷？ 答曰：陽明居中，土也，萬物所歸，無所復傳。始雖惡寒，二日自止，此爲陽明病也。

* 제185조[196] 本太陽初得病時，發其汗，汗先出不徹，因轉屬陽明也。

* 제185조[197] 傷寒發熱無汗，嘔不能食，而反汗出濇濇然者，是轉屬陽明也。

· 제186조[198] 傷寒三日，陽明脈大。

· 제187조[199] 傷寒脈浮而緩，手足自溫者，是爲繫在太陰。太陰者，身當發黃；若小便自利者，不能發黃。至七八日大便鞭者，爲陽明病也。

· 제188조[200] 傷寒轉繫陽明者，其人濇然微汗出也。

· 제189조[201] 陽明中風，口苦咽乾，腹滿微喘，發熱惡寒，脈浮而緊；若下之，則腹滿·小便難也。

· 제190조[202] 陽明病，若能食，名中風；不能食，名中寒。

· 제191조[203] 陽明病，若中寒，不能食，小便不利，手足濇然汗出，此欲作固瘕，必大便初鞭後溏。所以然者，以胃中冷，水穀不別故也。

· 제192조[204] 陽明病，欲食，小便反不利，大便自調，其人骨節疼，翕翕如有熱狀，奄然發狂，濇然汗出而解者，此水不勝穀氣，與汗共并，脈緊則愈。

· 제193조[205] 陽明病欲解時，從申至戌上。

· 제194조[206] 陽明病，不能食，攻其熱必噦。所以然者，胃中虛冷故也。以其人本虛，故攻其熱必噦。

· 제195조[207] 陽明病脈遲，食難用飽，飽則微煩，頭眩，必小便難，此欲作穀疸，雖下之，腹滿如故。所以然者，脈遲故也。

· 제196조[208] 陽明病法多汗，反無汗，其身如蟲行皮中狀者，此以久虛故也。

· 제197조[209] 陽明病，反無汗，而小便利，二三日，嘔而咳，手足厥者，必苦頭痛；若不咳不嘔，手足不厥者，頭不痛。

· 제198조[210] 陽明病，但頭眩，不惡寒，故能食而咳，其人必咽痛；若不咳者，咽不痛。

· 제199조[211] 陽明病無汗，小便不利，心中懊憹者，身必發黃。

· 제200조[212] 陽明病，被火，額上微汗出，小便不利者，必發黃。

· 제201조[213] 陽明病，脈浮而緊者，必潮熱，發作有時。但浮者，必盜汗出。

· 제202조[214] 陽明病，口燥，但欲漱水不欲咽者，此必衄。

· 제203조[215] 陽明病，本自汗出，醫更重發汗，病已差，尙微煩不了了者，此大便必鞭故也。以亡津液，胃中乾燥，故令大便鞭。當問其小便，日幾行。若本小便日三四行，今日再行，故知大便不久出；今爲小便數小，以津液當還入胃中，故知不久必大便也。

· 제204조[216] 傷寒嘔多，雖有陽明證不可攻之。

· 제205조[217] 陽明病，心下鞭滿者，不可攻之。攻之，利遂不止者死，利止自愈。

· 제206조[218] 陽明病，面合色赤，不可攻之，必發熱色黃者，小便不利也。

· 제207조[219] 陽明病，不吐不下，心煩者，可與調胃承氣湯。

· 제208조[220] 陽明病脈遲，雖汗出，不惡寒者，其身必重，短氣腹滿而喘，有潮熱者，此外欲解，可攻裏也。手足濇然汗出者，此大便已鞭也，大承氣湯主之；若汗多微發熱惡寒者，外未解也，其熱不潮，未可與承氣湯；若腹大滿不通者，可與小承氣湯，微和胃氣，勿令大泄下。

－ 大承氣湯方：

大黃[四兩. 酒洗]，厚朴[半斤. 炙，去皮]，枳實[五枚. 炙]，芒硝[三合]

上四味，以水一斗，先煮二物，取五升，去滓，內大黃，煮取二升，去滓，內芒硝，更上微火一兩沸，分溫再服。得下，餘勿服。

－ 小承氣湯方：

大黃[四兩]，厚朴[二兩. 炙，去皮]，枳實[三枚. 大者，炙]

已上三味，以水四升，煮取一升二合，去滓，分溫二服。初服湯，當更衣，不爾者，盡飲之；若更衣者，勿服之。

· 제209조[221] 陽明病，潮熱，大便微鞭者，可與大承氣湯；不鞭者，不與之。若不大便六七日，恐有燥屎，欲知之法，少與小承氣湯，湯入腹中，轉失氣者，此有燥屎，乃可攻之；若不轉失氣者，此但初頭鞭，後必溏，不可攻之，攻之，必脹滿不能食也。欲飲水者，與水則噦。其後發熱者，必大便復鞭而少也，以小承氣湯和之。不轉失氣者，慎不可攻也。

* 제210조[222] 夫實則譫語，虛則鄭聲。鄭聲重語也。

* 제210조[223] 直視譫語，喘滿者死。不利者亦死。

· 제211조[224] 發汗多，若重發汗者，亡其陽，譫語脈短者死；脈自和者，不死。

· 제212조[225] 傷寒若吐・若下後，不解，不大便五六日，上至十餘日，日晡所發潮熱，不惡寒，獨語如見鬼狀。若劇者，發則不識人，循衣摸床，惕而不

安，微喘直視，脈弦者生，濇者死，微者但發熱譫語者，大承氣湯主之。若一服利，止後服。

· 제213조[226] 陽明病，其人多汗，以津液外出，胃中燥，大便必鞭，鞭則譫語，小承氣湯主之。若一服譫語止，更莫復服。

· 제214조[227] 陽明病，譫語發潮熱，脈滑而疾者，小承氣湯主之。因與承氣湯一升，腹中轉失氣者，更服一升；若不轉失氣，勿更與之。明日不大便，脈反微濇者，裏虛也，爲難治，不可更與承氣湯也。

· 제215조[228] 陽明病，譫語有潮熱，反不能食者，胃中必有燥屎五六枚也。若能食者，但鞭耳，宜大承氣湯下之。

· 제216조[229] 陽明病，下血譫語者，此爲熱入血室；但頭汗出者，刺期門，隨其實而瀉之，濇然汗出則愈。

· 제217조[230] 汗出譫語者，以有燥屎在胃中，此爲風也，須下之，過經乃可下之。下之若早，語言必亂，以表虛裏實故也。下之則愈，宜大承氣湯。

· 제218조[231] 傷寒四五日，脈沈而喘滿。沈爲在裏，而反發其汗，津液越出，大便爲難，表虛裏實，久則譫語。

· 제219조[232] 三陽合病，腹滿身重，難以轉側，口不仁而面垢，譫語遺尿。發汗則譫語，下之則額上生汗，手足逆冷。若自汗出者，白虎湯主之。

· 제220조[233] 二陽并病，太陽證罷，但發潮熱，手足漿漿汗出，大便難而譫語者，下之則愈，宜大承氣湯。

· 제221조[234] 陽明病，脈浮而緊，咽燥口苦，腹滿而喘，發熱汗出，不惡寒，反惡熱，身重。若發汗則躁，心憤憤，反譫語；若加燒鍼，必怵惕煩躁，不得眠；若下之，則胃中空虛，客氣動膈，心中懊惱，舌上苔者，梔子豉湯主之。

· 제222조[235] 若渴欲飲水，口乾舌燥者，白虎加人參湯主之。

· 제223조[236] 若脈浮發熱，渴欲飲水，小便不利者，猪苓湯主之。

一 猪苓湯方：

猪苓[去皮]·茯苓·阿膠·滑石[碎]·澤瀉[各一兩]

上五味，以水四升，先煮四味，取二升，去滓，內下阿膠烱消，溫服七合，日三服。

· 제224조[237] 陽明病，汗出多而渴者，不可與猪苓湯，以汗多胃中燥，猪苓湯復利其小便故也。

· 제225조[238] 脈浮而遲，表熱裏寒，下利清穀者，四逆湯主之。

· 제226조[239] 若胃中虛冷，不能食者，飲水則噦。

· 제227조[240] 脈浮發熱，口乾鼻燥，能食者則衄。

・ 제228조[241] 陽明病下之，其外有熱，手足溫，不結胸，心中懊憹，飢不能食，但頭汗出者，梔子豉湯主之。

・ 제229조[242] 陽明病，發潮熱，大便溏，小便自可，胸脇滿不去者，小柴胡湯主之。

・ 제230조[243] 陽明病，脇下鞭滿，不大便而嘔，舌上白胎者，可與小柴胡湯。上焦得通，津液得下，胃氣因和，身濺然而汗出解也。

* 제231조[244] 陽明中風，脈弦浮大而短氣，腹都滿，脇下及心痛，久按之氣不通，鼻乾不得汗，嗜臥，一身及面目悉黃，小便難，有潮熱，時時噦，耳前後腫，刺之小差。外不解，病過十日，脈續浮者，與小柴胡湯。

* 제232조[244] 脈但浮，無餘證者，與麻黃湯；若不尿，腹滿加噦者，不治。

・ 제233조[245] 陽明病，自汗出，若發汗，小便自利者，此爲津液內竭，雖鞭不可攻之，當須自欲大便，宜蜜煎導而通之。若土瓜根及與大猪膽汁，皆可爲導。

－ 蜜煎導方：

蜜七合一味，內銅器中微火煎之，稍凝似飴狀，攪之勿令焦著，欲可丸，并手捻作挺，令頭銳，大如指，長二寸許，當熱時急作，冷則硬。以內穀道中，以手急抱，欲大便時乃去之。

－ 猪膽汁方：

大猪膽一枚，瀉汁，和醋少許，以灌穀道中，如一食頃，當大便出。

・ 제234조[246] 陽明病脈遲，汗出多，微惡寒者，表未解也，可發汗，宜桂枝湯。

・ 제235조[247] 陽明病脈浮，無汗而喘者，發汗則愈，宜麻黃湯。

・ 제236조[248] 陽明病，發熱汗出，此爲熱越，不能發黃也。但頭汗出，身無汗，劑頸而還，小便不利，渴引水漿者，此爲瘀熱在裏，身必發黃，茵陳湯主之。

－ 茵陳蒿湯方：

茵陳蒿[六兩]，梔子[十四枚。擘]，大黃[二兩。去皮]

上三味。以水一斗，先煮茵陳，減六升，內二味，煮取三升，去滓，分溫三服。小便當利，尿如皂角汁狀，色正赤，一宿腹減，黃從小便去也。

・ 제237조[249] 陽明證，其人喜忘者，必有畜血。所以然者，本有久瘀血，故令喜忘。屎雖鞭，大便反易，其色必黑，宜抵當湯下之。

・ 제238조[250] 陽明病，下之，心中懊憹而煩，胃中有燥屎者可攻。腹微滿，

初頭鞭，後必溏，不可攻之。若有燥屎者，宜大承氣湯。

・ 제239조[251] 病人不大便五六日，繞臍痛，煩躁，發作有時者，此有燥屎，故使不大便也。

・ 제240조[252] 病人煩熱，汗出則解，又如瘧狀，日晡所發熱者，屬陽明也。脈實者宜下之；脈浮虛者，宜發汗。下之與大承氣湯，發汗宜桂枝湯。

・ 제241조[253] 大下後，六七日不大便，煩不解，腹滿痛者，此有燥屎也。所以然者，本有宿食故也，宜大承氣湯。

・ 제242조[254] 病人小便不利，大便乍難乍易，時有微熱，喘冒不能臥者，有燥屎也，宜大承氣湯。

・ 제243조[255] 食穀欲嘔者，屬陽明也，吳茱萸湯主之。得湯反劇者，屬上焦也。

－ 吳茱萸湯方：

吳茱萸[一升. 洗]，人參[三兩]，生薑[六兩. 切]，大棗[十二枚. 擘]

上四味，以水七升，煮取二升，去滓，溫服七合，日三服。

・ 제244조[256] 太陽病，寸緩・關浮・尺弱，其人發熱汗出，復惡寒，不嘔，但心下痞者，此以醫下之也。如其不下者，病人不惡寒而渴者，此轉屬陽明也。小便數者，大便必鞭，不更衣十日，無所苦也。渴欲飲水，少少與之，但以法救之。渴者，宜五苓散。

* 제245조[257] 脈陽微而汗出少者，爲自和也；汗出多者，爲太過。

* 제245조[258] 陽脈實，因發其汗出多者，亦爲太過。太過爲陽絕於裏，亡津液，大便因鞭也。

・ 제246조[259] 脈浮而芤，浮爲陽，芤爲陰，浮芤相搏，胃氣生熱，其陽則絕。

・ 제247조[260] 趺陽脈浮而澁，浮則胃氣強，澁則小便數，浮澁相搏，大便則難，其脾爲約，麻仁丸主之。

－ 麻仁丸方：

麻子仁[二升]，芍藥[半斤]，枳實[半斤. 炙]，大黃[一斤. 去皮]，厚朴[一斤. 炙，去皮]，杏仁[一斤. 去皮尖，熬，別作脂]

上六味，爲末，煉蜜爲丸，桐子大。飲服十丸，日三服，漸加，以知爲度。

・ 제248조[261] 太陽病三日，發汗不解，蒸蒸發熱者，屬胃也，調胃承氣湯主之。

・ 제249조[262] 傷寒吐後，腹脹滿者，與調胃承氣湯。

· 제250조[263] 太陽病，若吐・若下・若發汗，微煩，小便數，大便因鞭者，與小承氣湯和之愈.

· 제251조[264] 得病二三日，脈弱，無太陽柴胡證，煩躁，心下鞭，至四五日，雖能食，以小承氣湯少少與，微和之，令小安，至六日，與承氣湯一升. 若不大便六七日，小便少者，雖不能食，但初頭鞭，後必溏，未定成鞭，攻之必溏，須小便利，屎定鞭，乃可攻之，宜大承氣湯.

· 제252조[265] 傷寒六七日，目中不了了，睛不和，無表裏證，大便難，身微熱者，此爲實也. 急下之，宜大承氣湯.

· 제253조[266] 陽明病，發熱，汗多者，急下之，宜大承氣湯.

· 제254조[267] 發汗不解，腹滿痛者，急下之，宜大承氣湯.

· 제255조[268] 腹滿不減，減不足言，當下之，宜大承氣湯.

· 제256조[269] 陽明少陽合病，必下利. 其脈不負者，順也；負者，失也，互相克賊，名曰負也. 脈滑而數者，有宿食也，當下之，宜大承氣湯.

· 제257조[270] 病人無表裏證，發熱七八日，雖脈浮數者，可下之. 假令已下，脈數不解，合熱則消穀喜飢，至六七日，不大便者，有瘀血，宜抵當湯.

· 제258조[271] 若脈數不解，而下不止，必協熱而便膿血也.

· 제259조[272] 傷寒，發汗已，身目爲黃，所以然者，以寒濕在裏，不解故也. 以爲不可下也，於寒濕中求之.

· 제260조[273] 傷寒七八日，身黃如橘子色，小便不利，腹微滿者，茵陳蒿湯主之.

· 제261조[274] 傷寒身黃發熱者，梔子蘘皮湯主之.

－ 梔子蘘皮湯：

梔子[一十五個]，甘草[一兩]，黃蘘[二兩]

上三味，以水四升，煮取一升半，去滓，分溫再服.

· 제262조[275] 傷寒瘀熱在裏，身必發黃，麻黃連軹赤小豆湯主之.

－ 麻黃連軹赤小豆湯方：

麻黃[二兩. 去節]，赤小豆[一升]，連軹[二兩. 連翹根也]，杏仁[四十個. 去皮尖]，大棗[十二枚]，生梓白皮[一升]，生薑[二兩. 切]，甘草[二兩. 炙]

已上八味，以潦水一斗，先煮麻黃再沸，去上沫，內諸藥，煮取三升，分溫三服，半日服盡.

□ 少陽病 제263조～제272조[276～285]

- 제263조[276] 少陽之病，口苦・咽乾・目眩也.
- 제264조[277] 少陽中風，兩耳無所聞，目赤，胸中滿而煩者，不可吐下，吐下則悸而驚.
- 제265조[278] 傷寒，脈弦細，頭痛，發熱者，屬少陽. 少陽不可發汗，發汗則譫語. 此屬胃，胃和則愈，胃不和，則煩而悸.
- 제266조[279] 本太陽病不解，轉入少陽者，脇下鞭滿，乾嘔不能食，往來寒熱，尚未吐下，脈沈緊者，與小柴胡湯.
- 제267조[280] 若已吐・下・發汗・溫鍼，譫語，柴胡湯證罷，此爲壞病，知犯何逆，以法治之.
- 제268조[281] 三陽合病，脈浮大，上關上，但欲眠睡，目合則汗.
- 제269조[282] 傷寒六七日，無大熱，其人躁煩者，此爲陽去入陰故也.
- 제270조[283] 傷寒三日，三陽爲盡，三陰當受邪. 其人反能食而不嘔，此爲三陰不受邪也.
- 제271조[284] 傷寒三日，少陽脈小者，欲已也.
- 제272조[285] 少陽病，欲解時，從寅至辰上.

□ 太陰病 제273조~제280조[286~294]

- 제273조[286] 太陰之爲病，腹滿而吐，食不下，自利益甚，時腹自痛. 若下之，必胸下結鞭.
- 제274조[287] 太陰中風，四肢煩疼，陽微陰澁而長者，爲欲愈.
- 제275조[288] 太陰病欲解時，從亥至丑上.
- 제276조[289] 太陰病脈浮者，可發汗，宜桂枝湯.
- 제277조[290] 自利不渴者，屬太陰，以其藏有寒故也. 當溫之，宜服四逆輩.
- 제278조[291] 傷寒脈浮而緩，手足自溫者，繫在太陰. 太陰當發身黃；若小便自利者，不能發黃. 至七八日，雖暴煩，下利日十餘行，必自止，以脾家實，腐穢當去故也.
- * 제279조[292] 本太陽病，醫反下之，因而腹滿時痛者，屬太陰也，桂枝加芍藥湯主之.
- 桂枝加芍藥湯方：
- 於桂枝湯方內，更加芍藥三兩，隨前共六兩，餘依桂枝湯法.
- * 제279조[293] 大實痛者，桂枝加大黃湯主之.

－ 桂枝加大黃湯方：

桂枝[三兩. 去皮], 大黃[一兩], 芍藥[六兩], 生薑[三兩. 切], 甘草[二兩. 炙], 大棗[十二枚. 擘]

上六味, 以水七升, 煮取三升, 去滓, 溫服一升, 日三服.

・ 제280조[294] 太陰爲病脈弱, 其人續自便利, 設當行大黃芍藥者, 宜減之, 以其人胃氣弱, 易動故也.

□ 少陰病 제281조 ~ 제325조[295~339]

・ 제281조[295] 少陰之爲病, 脈微細, 但欲寐也.

・ 제282조[296] 少陰病, 欲吐不吐, 心煩, 但欲寐, 五六日, 自利而渴者, 屬少陰也, 虛故引水自救. 若小便色白者, 少陰病形悉具. 小便白者, 以下焦虛有寒, 不能制水, 故令色白也.

・ 제283조[297] 病人脈陰陽俱緊, 反汗出者, 亡陽也, 此屬少陰, 法當咽痛, 而復吐利.

・ 제284조[298] 少陰病, 咳而下利譫語者, 被火氣劫故也, 小便必難, 以強責少陰汗也.

・ 제285조[299] 少陰病, 脈細沈數, 病爲在裏, 不可發汗.

・ 제286조[300] 少陰病, 脈微, 不可發汗, 亡陽故也. 陽已虛, 尺脈弱澁者, 復不可下之.

・ 제287조[301] 少陰病脈緊, 至七八日, 自下利, 脈暴微, 手足反溫, 脈緊反去者, 爲欲解也, 雖煩下利, 必自愈.

・ 제288조[302] 少陰病, 下利, 若利自止, 惡寒而蜷臥, 手足溫者, 可治.

・ 제289조[303] 少陰病, 惡寒而蜷, 時自煩, 欲去衣被者可治.

・ 제290조[304] 少陰中風, 脈陽微陰浮者, 爲欲愈.

・ 제291조[305] 少陰病欲解時, 從子至寅上.

・ 제292조[306] 少陰病, 吐利, 手足不逆冷, 反發熱者, 不死. 脈不至者, 灸少陰七壯.

・ 제293조[307] 少陰病, 八九日, 一身手足盡熱者, 以熱在膀胱, 必便血也.

・ 제294조[308] 少陰病, 但厥無汗, 而強發之, 必動其血, 未知從何道出, 或從口鼻, 或從目出, 是名下厥上竭, 爲難治.

・ 제295조[309] 少陰病, 惡寒身蜷而利, 手足逆冷者, 不治.

・ 제296조[310] 少陰病, 吐利, 躁煩, 四逆者死.

- ・ 제297조[311] 少陰病，下利止而頭眩，時時自冒者死。
- ・ 제298조[312] 少陰病，四逆惡寒而身踰，脈不至，不煩而躁者，死。
- ・ 제299조[313] 少陰病，六七日，息高者，死。
- ・ 제300조[314] 少陰病，脈微細沈，但欲臥，汗出不煩，自欲吐，至五六日，自利，復煩躁，不得臥寐者，死。
- ・ 제301조[315] 少陰病，始得之，反發熱，脈沈者，麻黃附子細辛湯主之。
 - － 麻黃附子細辛湯方：
 - 麻黃[二兩. 去節]，細辛[二兩]，附子[一枚. 炮，去皮，破八片]
 - 上三味. 以水一斗，先煮麻黃，減二升，去上沫，**內藥**，煮取三升，去滓，溫服一升，日三服。
- ・ 제302조[316] 少陰病，得之二三日，麻黃附子甘草湯微發汗。以二三日無裏證，故發微汗也。
 - － 麻黃附子甘草湯方：
 - 麻黃[二兩. 去節]，甘草[二兩. 炙]，附子[一枚. 炮，去皮]
 - 上三味. 以水七升，先煮麻黃一兩沸，去上沫，**內諸藥**，煮取三升，去滓，溫服一升，日三服。
- ・ 제303조[317] 少陰病，得之二三日以上，心中煩，不得臥，黃連阿膠湯主之。
 - － 黃連阿膠湯方：
 - 黃連[四兩]，黃芩[一兩]，芍藥[二兩]，鷄子黃[二枚]，阿膠[三兩]
 - 上五味，以水五升，先煮三物，取二升，去滓，**內膠烱盡**，小冷，**內鷄子黃**，攪令相得，溫服七合，日三服。
- ・ 제304조[318] 少陰病，得之一二日，口中和，其背惡寒者，當灸之，附子湯主之。
 - － 附子湯方：
 - 附子[二枚. 破八片，去皮]，茯苓[三兩]，人參[二兩]，白朮[四兩]，芍藥[三兩]
 - 上五味，以水八升，煮取三升，去滓，溫服一升，日三服。
- ・ 제305조[319] 少陰病，身體痛，手足寒，骨節痛，脈沈者，附子湯主之。
- ・ 제306조[320] 少陰病，下利便膿血者，桃花湯主之。
 - － 桃花湯方：
 - 赤石脂[一斤. 一半全用，一半篩末]，乾薑[一兩]，粳米[一斤]
 - 上三味，以水七升，煮米令熟，去滓，溫服七合，**內赤石脂末**，方寸匕，日三服。若一服

愈，餘勿服。

・ 제307조[321] 少陰病，二三日至四五日，腹痛，小便不利，下利不止便膿血者，桃花湯主之。

・ 제308조[322] 少陰病，下利便膿血者，可刺。

・ 제309조[323] 少陰病，吐利，手足逆冷，煩躁欲死者，吳茱萸湯主之。

・ 제310조[324] 少陰病，下利，咽痛，胸滿心煩者，豬膚湯主之。

－ 豬膚湯方：

豬膚[一斤]

上一味，以水一斗，煮取五升，去滓，加白蜜一升，白粉五合，熬香，和相得，溫分六服。

・ 제311조[325] 少陰病，二三日咽痛者，可與甘草湯；不差者，與桔梗湯。

－ 甘草湯方：

甘草[二兩]

上一味，以水三升，煮取一升半，去滓，溫服七合，日二服。

－ 桔梗湯方：

桔梗[一兩]，甘草[二兩]

上二味，以水三升，煮取一升，去滓，分溫再服。

・ 제312조[326] 少陰病，咽中傷生瘡，不能語言，聲不出者，苦酒湯主之。

－ 苦酒湯方：

半夏[洗，破，如棗核大十四枚]，鷄子[一枚，去黃，內上苦酒著鷄子殼中]

上二味，內半夏，著苦酒中，以鷄子殼，置刀環中，安火上，令三沸，去滓，少少含咽之。不差，更作三劑。

・ 제313조[327] 少陰病咽中痛，半夏散及湯主之。

－ 半夏散及湯方：

半夏[洗]・桂枝[去皮]・甘草[炙，以上各等分]

已上三味，各別搗篩已，合治之，白飲和，服方寸匕，日三服。若不能散服者，以水一升，煎七沸，內散兩方寸匕，更煎三沸，下火令小冷，少少咽之。

・ 제314조[328] 少陰病，下利，白通湯主之。

－ 白通湯方：

葱白[四莖]，乾薑[一兩]，附子[一枚，生用，去皮，破八片]

上三味，以水三升，煮取一升，去滓，分溫再服。

・ 제315조[329] 少陰病，下利脈微者，與白通湯；利不止，厥逆無脈，乾嘔

煩者，白通加豬膽汁湯主之。服湯脈暴出者死，微續者生。

－ 白通加豬膽汁湯方：

葱白[四莖]，乾薑[一兩]，附子[一枚。生，去皮，破八片]，人尿[五合]，豬膽汁[一合]

已上三味，以水三升，煮取一升，去滓，內膽汁・人尿，和令相得，分溫再服，若無膽亦可用。

・ 제316조[330] 少陰病，二三日不已，至四五日，腹痛，小便不利，四肢沈重疼痛，自下利者，此爲有水氣，其人或咳，或小便利，或下利，或嘔者，眞武湯主之。

－ 眞武湯方：

茯苓[三兩]，芍藥[三兩]，生薑[三兩。切]，白朮[二兩]，附子[一枚。炮，去皮，破八片]

上五味，以水八升，煮取三升，去滓，溫服七合，日三服。

－ 後加減法：

若咳者，加五味半斤，細辛・乾薑各一兩。若小便利者，去茯苓。若下利者，去芍藥，加乾薑二兩。若嘔者，去附子，加生薑，足前成半斤。

・ 제317조[331] 少陰病，下利清穀，裏寒外熱，手足厥逆，脈微欲絕，身反不惡寒，其人面赤色，或腹痛，或乾嘔，或咽痛，或利止，脈不出者，通脈四逆湯主之。

－ 通脈四逆湯方：

甘草[二兩。炙]，附子[大者一枚。生用，去皮，破八片]，乾薑[三兩。強人可四兩]

上三味，以水三升，煮取一升二合，去滓，分溫再服。其脈即出者愈。

面色赤者，加葱九莖。腹中痛者，去葱，加芍藥二兩。嘔者，加生薑二兩。咽痛者，去芍藥，加桔梗一兩。利止脈不出者，去桔梗，加人參二兩。

・ 제318조[332] 少陰病，四逆，其人或咳，或悸，或小便不利，或腹中痛，或泄利下重者，四逆散主之。

－ 四逆散方：

甘草[炙]・枳實[破，水漬炙乾]・柴胡・芍藥。

上四味，各十分，搗篩，白飲和，服方寸匕，日三服。

咳者，加五味子・乾薑各五分，并主下痢。悸者，加桂枝五分。小便不利者，加茯苓五分。腹中痛者，加附子一枚，炮令坼。泄利下重者，先以水五升，煮薤白三升，煮取三升，去滓，以散三方寸匕，內湯中，煮取一升半，分溫再服。

・ 제319조[333] 少陰病，下利六七日，咳而嘔渴，心煩，不得眠者，猪苓湯主之.

・ 제320조[334] 少陰病，得之二三日，口燥咽乾者，急下之，宜大承氣湯.

・ 제321조[335] 少陰病，自利清水，色純青，心下必痛，口乾燥者，急下之，宜大承氣湯.

・ 제322조[336] 少陰病，六七日，腹脹不大便者，急下之，宜大承氣湯.

・ 제323조[337] 少陰病，脈沈者，急溫之，宜四逆湯.

・ 제324조[338] 少陰病，飲食入口則吐，心中溫溫欲吐，復不能吐，始得之，手足寒，脈弦遲者，此胸中實，不可下也，當吐之. 若膈上有寒飲，乾嘔者，不可吐也，當溫之，宜四逆湯.

・ 제325조[339] 少陰病，下利，脈微澁，嘔而汗出，必數更衣；反少者，當溫其上灸之.

□ 厥陰病 제326조~제381조[340~396]

・ 제326조[340] 厥陰之爲病，消渴，氣上撞心，心中疼熱，飢而不欲食，食則吐衄，下之利不止.

・ 제327조[341] 厥陰中風，脈微浮，爲欲愈；不浮，爲未愈.

・ 제328조[342] 厥陰病，欲解時，從寅至卯上.

・ 제329조[343] 厥陰病，渴欲飲水者，少少與之，愈.

・ 제330조[344] 諸四逆厥者，不可下之，虛家亦然.

・ 제331조[345] 傷寒先厥，後發熱而利者，必自止. 見厥復利.

・ 제332조[346] 傷寒始發熱，六日，厥反九日而利. 凡厥利者，當不能食，今反能食者，恐爲除中，食以索餅，不發熱者，知胃氣尚在，必愈，恐暴熱來出而復去也. 後三日脈之，其熱續在者，期之旦日夜半愈. 所以然者，本發熱六日，厥反九日，復發熱三日，并前六日，亦爲九日，與厥相應，故期之旦日夜半愈. 後三日脈之而脈數，其熱不罷者，此爲熱氣有餘，必發癰膿也.

・ 제333조[347] 傷寒脈遲，六七日，而反與黃芩湯徹其熱. 脈遲爲寒，今與黃芩湯，復除其熱，腹中應冷，當不能食；今反能食，此名除中，必死.

・ 제334조[348] 傷寒先厥後發熱，下利必自止，而反汗出，咽中痛者，其喉爲痺. 發熱無汗而利必自止，若不止，必便膿血. 便膿血者，其喉不痺.

・ 제335조[349] 傷寒一二日，至四五日而厥者，必發熱，前熱者，後必厥，厥甚者，熱亦甚，厥微者，熱亦微，厥應下之，而反發汗者，必口傷爛赤.

· 제336조[350] 傷寒病，厥五日，熱亦五日；設六日當復厥，不厥者，自愈。厥終不過五日，以熱五日，故知自愈。

· 제337조[351] 凡厥者，陰陽氣不相順接，便爲厥。厥者，手足逆冷是也。

· 제338조[352] 傷寒，脈微而厥，至七八日，膚冷，其人躁，無暫安時者，此爲藏厥，非爲蚘厥也。蚘厥者，其人當吐蚘。令病者靜，而復時煩，此爲藏寒。蚘上入膈，故煩，須臾復止，得食而嘔，又煩者，蚘聞食臭出，其人當自吐蚘。蚘厥者，烏梅丸主之。又主久利方。

一 烏梅丸方：

烏梅[三百個]，細辛[六兩]，乾薑[十兩]，黃連[一斤]，當歸[四兩]，附子[六兩。炮]，蜀椒[四兩。去子]，桂枝[六兩]，人參[六兩]，黃蘗[六兩]

上十味。異搗篩，合治之，以苦酒漬烏梅一宿，去核，蒸之五升米下，飯熟，搗成泥，和藥令相得，內臼中，與蜜，杵二千下，丸如梧桐子大。先食飲，服十丸，日三服，稍加至二十丸。禁生冷・滑物・臭食等。

· 제339조[353] 傷寒，熱少厥微，指頭寒，默默不欲食，煩躁數日，小便利，色白者，此熱除也，欲得食，其病爲愈；若厥而嘔，胸脇煩滿者，其後必便血。

· 제340조[354] 病者手足厥冷，言我不結胸，少腹滿，按之痛者，此冷結在膀胱關元也。

· 제341조[355] 傷寒發熱四日，厥反三日，復熱四日，厥少熱多，其病當愈。四日至七日，熱不除者，其後必便膿血。

· 제342조[356] 傷寒厥四日，熱反三日，復厥五日，其病爲進，寒多熱少，陽氣退，故爲進也。

· 제343조[357] 傷寒六七日，脈微，手足厥冷，煩躁，灸厥陰，厥不還者，死。

· 제344조[358] 傷寒發熱，下利，厥逆，躁不得臥者，死。

· 제345조[359] 傷寒發熱，下利至甚，厥不止者，死。

· 제346조[360] 傷寒六七日，不利，便發熱而利，其人汗出不止者，死。有陰無陽故也。

· 제347조[361] 傷寒五六日，不結胸，腹濡，脈虛，復厥者，不可下，此爲亡血，下之死。

· 제348조[362] 發熱而厥，七日，下利者，爲難治。

· 제349조[363] 傷寒脈促，手足厥逆者，可灸之。

· 제350조[364] 傷寒脈滑而厥者，裏有熱也，白虎湯主之。

· 제351조[365] 手足厥寒，脈細欲絕者，當歸四逆湯主之。

－ 當歸四逆湯方：

當歸[三兩]，桂枝[三兩]，芍藥[三兩]，細辛[三兩]，大棗[二十五個]，甘草[二兩，炙]，通草[二兩]

上七味，以水八升，煮取三升，去滓，溫服一升，日三服。

· 제352조[366] 若其人內有久寒者，宜當歸四逆加吳茱萸生薑湯主之。

－ 四(趙本四上有“當歸”二字)逆加吳茱萸生薑湯方：

當歸[二兩]，芍藥[三兩]，甘草[二兩，炙]，通草[二兩]，桂枝[三兩，去皮]，細辛[三兩]，生薑[半斤，切]，大棗[二十五枚，擘]，吳茱萸[二升]

上九味，以水六升，清酒六升，和煮取五升，去滓，溫分五服。一方水酒各四升。

· 제353조[367] 大汗出，熱不去，內拘急，四肢疼，又下利，厥逆而惡寒者，四逆湯主之。

· 제354조[368] 大汗，若大下利而厥冷者，四逆湯主之。

· 제355조[369] 病人手足厥冷，脈乍緊者，邪結在胸中。心下滿而煩，飢不能食者，病在胸中，當須吐之，宜瓜蒂散。

· 제356조[370] 傷寒厥而心下悸者，宜先治水，當服茯苓甘草湯，却治其厥；不爾，水漬入胃，必作利也。

· 제357조[371] 傷寒六七日，大下後，寸脈沈而遲，手足厥逆，下部脈不至，咽喉不利，唾膿血，泄利不止者，爲難治。麻黃升麻湯主之。

－ 麻黃升麻湯方：

麻黃[二兩半，去節]，升麻[一兩一分]，當歸[一兩一分]，知母·黃芩·萎蕤[各十八銖]，石膏[碎，綿裹]·白朮·乾薑·芍藥·天門冬[去心]·桂枝·茯苓·甘草[炙，各六銖]

上十四味，以水一斗，先煮麻黃一兩沸，去上沫，內諸藥，煮取三升，去滓，分溫三服。相去如炊三斗米頃，令盡，汗出愈。

· 제358조[372] 傷寒四五日，腹中痛，若轉氣下趣少腹者，此欲自利也。

· 제359조[373] 傷寒本自寒下，醫復吐下之，寒格，更逆吐下；若食入口即吐，乾薑黃連黃芩人參湯主之。

－ 乾薑黃連黃芩人參湯方：

乾薑·黃連·黃芩·人參[各三兩]

上四味，以水六升，煮取二升，去滓，分溫再服。

· 제360조[374] 下利，有微熱而渴，脈弱者，今自愈。

· 제361조[375] 下利, 脈數, 有微熱汗出, 今自愈; 設復緊, 爲未解.

* 제362조[376] 下利, 手足厥冷無脈者, 灸之不溫, 若脈不還, 反微喘者, 死.

* 제362조[377] 少陰負趺陽者, 爲順也.

· 제363조[378] 下利, 寸脈反浮數, 尺中自澁者, 必清膿血.

· 제364조[379] 下利清穀, 不可攻表, 汗出, 必脹滿.

· 제365조[380] 下利, 脈沈弦者, 下重也; 脈大者, 爲未止; 脈微弱數者, 爲欲自止, 雖發熱不死.

· 제366조[381] 下利, 脈沈而遲, 其人面少赤, 身有微熱, 下利清穀者, 必鬱冒, 汗出而解, 病人必微厥. 所以然者, 其面戴陽, 下虛故也.

· 제367조[382] 下利, 脈數而渴者, 今自愈; 設不差, 必清膿血, 以有熱故也.

· 제368조[383] 下利後脈絕, 手足厥冷, 晬時脈還, 手足溫者生, 脈不還者死.

· 제369조[384] 傷寒下利, 日十餘行, 脈反實者死.

· 제370조[385] 下利清穀, 裏寒外熱, 汗出而厥者, 通脈四逆湯主之.

· 제371조[386] 熱利下重者, 白頭翁湯主之.

一 白頭翁湯方 :

白頭翁[二兩], 黃柏·黃連·秦皮[各三兩]

上四味, 以水七升, 煮取二升, 去滓, 溫服一升; 不愈, 更服一升.

· 제372조[387] 下利, 腹脹滿, 身體疼痛者, 先溫其裏, 乃攻其表. 溫裏四逆湯; 攻表桂枝湯.

· 제373조[388] 下利, 欲飲水者, 以有熱故也, 白頭翁湯主之.

· 제374조[389] 下利, 譫語者, 有燥屎也, 宜小承氣湯.

· 제375조[390] 下利後更煩, 按之心下濡者, 爲虛煩也, 宜梔子豉湯.

· 제376조[391] 嘔家有癰膿者, 不可治, 嘔膿盡自愈.

· 제377조[392] 嘔而脈弱, 小便復利, 身有微熱見厥者難治. 四逆湯主之.

· 제378조[393] 乾嘔, 吐涎沫, 頭痛者, 吳茱萸湯主之.

· 제379조[394] 嘔而發熱者, 小柴胡湯主之.

· 제380조[395] 傷寒大吐大下之, 極虛, 復極汗出者, 以其人外氣怫鬱, 復與之水, 以發其汗, 因得嘔. 所以然者, 胃中寒冷故也.

· 제381조[396] 傷寒, 嘔而腹滿, 視其前後, 知何部不利, 利之則愈.

□ 霍亂病 제382조~제391조[397~407]

· 제382조[397] 問曰：病有霍亂者何？答曰 嘔吐而利，名曰霍亂。

· 제383조[398] 問曰：病發熱，頭痛，身疼，惡寒，吐利者，此屬何病？答曰：此名霍亂。自吐下，又利止，復更發熱也。

* 제384조[399] 傷寒，其脈微澁者，本是霍亂，今是傷寒，却四五日，至陰經上，轉入陰必利，本嘔下利者，不可治也。欲似大便而反失氣，仍不利者，屬陽明也，便必鞭，十三日愈，所以然者，經盡故也。

* 제384조[400] 下利後，當便鞭，鞭則能食者愈；今反不能食，到後經中，頗能食，復過一經能食，過之一日，當愈。不愈者，不屬陽明也。

· 제385조[401] 惡寒脈微，而復利，利止，亡血也，四逆加人參湯主之。

－ 四逆加人參湯方：

於四逆湯方內，加人參一兩。餘依四逆湯法服。

· 제386조[402] 霍亂，頭痛，發熱，身疼痛，熱多欲飲水者，五苓散主之；寒多不用水者，理中丸主之。

－ 理中丸方：

人參·甘草[炙]·白朮·乾薑[已上各三兩]

上四味，搗篩爲末，蜜和丸，如鷄黃大，以沸湯數合，和一丸，研碎，溫服之。日三四，夜二服，腹中未熱，益至三四丸，然不及湯。湯法。以四物依兩數切，用水八升，煮取三升，去滓，溫服一升，日三服。

－ 加減法：

若臍上築者，腎氣動也，去朮加桂四兩。吐多者，去朮，加生薑三兩。下多者，還用朮。悸者，加茯苓二兩。渴欲得水者，加朮，足前成四兩半。腹中痛者，加人參，足前成四兩半。寒者，加乾薑，足前成四兩半。腹滿者，去朮，加附子一枚。服湯後，如食頃，飲熱粥一升許，微自溫，勿發揭衣被。

· 제387조[403] 吐利止而身痛不休者，當消息和解其外，宜桂枝湯小和之。

· 제388조[404] 吐利汗出，發熱惡寒，四肢拘急，手足厥冷者，四逆湯主之。

· 제389조[405] 既吐且利，小便復利而大汗出，下利清穀，內寒外熱，脈微欲絕者，四逆湯主之。

· 제390조[406] 吐已下斷，汗出而厥，四肢拘急不解，脈微欲絕者，通脈四逆加豬膽汁湯主之。

－ 四逆加豬膽汁湯方：

於四逆湯方內，加入猪膽汁半合，餘依前法服；如無猪膽，以羊膽代之。

・ 제391조[407] 吐利發汗，脈平，小煩者，以新虛不勝穀氣故也。

□ 陰陽易差後勞復病 제392조～제398조[408～414]

・ 제392조[408] 傷寒，陰陽易之爲病，其人身體重，少氣，少腹裏急，或引陰中拘攣，熱上衝胸，頭重不欲舉，眼中生花，膝脛拘急者，燒裊散主之。

－ 燒裊散方：

上取婦人中裊近隱處，剪燒灰，以水和服方寸匕，日三服。小便卽利，陰頭微腫，則愈。婦人病，取男子裊當燒灰。

・ 제393조[409] 大病差後，勞復者，枳實梔子豉湯主之。若有宿食者，加大黃如博碁子大五六枚。

－ 枳實梔子豉湯方：

枳實[三枚. 炙]，梔子[十四枚. 擘]，豉[一升. 綿裹]

上三味，以清漿水七升，空煮取四升，內枳實・梔子，煮取二升，下豉，更煮五六沸，去滓，溫分再服，覆令微似汗。

・ 제394조[410] 傷寒差已後，更發熱者，小柴胡湯主之。脈浮者，以汗解之；脈沈實者，以下解之。

・ 제395조[411] 大病差後，從腰已下有水氣者，牡蠣澤瀉散主之。

－ 牡蠣澤瀉散方：

牡蠣[熬]・澤瀉・栝蒌根・蜀漆[洗，去脚(趙本作“腥”)]・葶藶[熬]・商陸根[熬]・海藻[洗去鹹，以上各等分]

上七味，異搗下篩爲散，更入臼中治之，白飲和，服方寸匕。小便利，止後服。日三服。

・ 제396조[412] 大病差後，喜唾，久不了了者，胃上有寒，當以丸藥溫之，宜理中丸。

・ 제397조[413] 傷寒解後，虛羸少氣，氣逆欲吐者，竹葉石膏湯主之。

－ 竹葉石膏湯方：

竹葉[二把]，石膏[一斤]，半夏[半升. 洗]，人參[三兩]，甘草[二兩. 炙]，粳米[半升]，麥門冬[一升. 去心]

上七味，以水一斗，煮取六升，去滓，內粳米，煮米熟，湯成，去米，溫服一升，日三服。

・ 제398조[414] 病人脈已解，而日暮微煩，以病新差，人強與穀，脾胃氣尙弱，不能消穀，故令微煩，損穀則愈。